


甯用津縣志

22.6213
303.5.073
7



Kodak Color Control Patches



甯津縣志卷十

光緒二十六年重修

藝文志

藝之訓文始見舜典歸格于藝祖



藝為教而藝與文並稱矣至漢書遂立藝文志然僅著篇名其文皆不錄蓋自三代以來凡經世文章多勒之於金石不但漢光和魏正始唐開成之石經也他若鐘鼎之款識碑碣之流傳其載記哀然成帙者夥矣故金石亦次於著述焉甯邑固分割之區屢經廢併燹餘殘稿觚臄遺鈔亦惟舉所知者而已志藝文

4234801

1088821

著述

北朝

易林雜占百餘卷

中散大夫吳遵世字季緒著

宋

經用方書三十卷

論候十卷 今體治世集二十卷

檢校戶部郎中劉翰著

明

西遊隨筆

覽涉雜興

瑯琊樂府小集

陝西都司經歷司都事王坪字國瑞著

籌邊八議

課屬十事

甯津縣志

霸州兵備副使王良貴字少思著

國朝

四書敘典

二論析講

松菊齋文稿

歲貢生苑思順著

言志集詩稿

闕疑集十五卷

翰林院庶吉士趙笏字景汾著

蜚轉集文稿

海珊詩稿

歲貢生王宣猷字甸旬著

梅崑文鈔

梅崑詩集

冀州學正蘇廷瑞字班侯著

我知集

舉人張瑞字祥圃著

宦遊詩草四卷

四川新津知縣苑體曾字祚長著

大易集解二卷

廩生王運泰字際昌著

論語遵註二卷

六王節要四卷

庠生井鑫字公庭著

病方合詠一卷

聖經詳解

附生井藥字秀圃著

倒縐偶筆

學庸精義

附生宋則字再甫著

四書會講

歲貢生李應選著

唐詩源流論

蘭州教諭苑本會字蘭孫著

竹溪山房文稿

竹溪山房詩存

津門竹枝詞

安平教諭楊省
吾字景參著

綠陰山房詩稿

滿城縣訓導苑
秉謙字靜涵著

讀易解十二卷

禹貢解四卷

洪範解四卷

古本

大學解四卷

論語解二十卷

此君園文集三十卷

此君園詩存二卷

竹庵詩鈔四卷

學詩臆說一卷

詠史百篇二卷

此君園文集續鈔

竹庵詩鈔續集

饒州府同知吳
名鳳字竹庵著

勉學齋文稿

勉學齋詩稿

舉人周涖
字以莊著

周禮註解

歲貢生楊秉
哲字頴濬著

無逸軒文稿

恩貢生
李沂著

知命錄二卷

賞欣集四卷

天津府教授杜
墨林字西園著

穀音集

增生楊
振鐸著

柳東課草

一株松軒詩草

四書補義

書經參解

詩經參解

寶坻訓導李
諤字慎庵著

編年窗稿四卷 蕉夢山房詩稿四卷

郡庠生道光己亥科挑取
膳錄吳匯源字東湖著

肥遯窩詠古詩集千篇

郡庠生吳
潤源著

十五芝山房文集

署湖南巡撫龐
際雲字省三著

梅花書屋詩賦草

刑部主事周
濬字距川著

脈訣要論 藥性辨同

廩貢生劉
源長著

萬青精舍錄

歲貢生劉長
庚字續昶著

測器圖說四卷 弧角簡易二卷 弧角捷要一卷


西法星命釋例二卷 交食細草一卷 新訂交食算

例二卷 菊譜一卷

額外中書例貢生
李鈗字珍同著

說詩八贅 吳裝畫鏡

廩生李
兮簪著



金石

商庚午父乙鼎

商庚午父乙鼎
庚午王命寢留辰
相北田四品之一夕止
冊友史錫賴貝
用作父乙尊廿冊

庚午王命寢留辰
相北田四品之一夕止
冊友史錫賴貝
用作父乙尊廿冊

按此鼎銘宣和博古圖辭氏款識阮氏積古齋並摹
刻首行第五六字辭釋寢廟阮本剝泐闕文今此鼎
其字尚存實作寢留乃古寢廟省文辭釋是也末行
隳廿阮釋作尊鼎疑是作尊二十周禮膳夫鼎十有

二物鄭注牢鼎九陪鼎三又郊特牲鼎俎奇陳澹注其十鼎者陪鼎三則正鼎亦七由此論之知廟祭之用鼎多矣故此鑄以二十蓋其備豫有如此者禮志曰皇祐五年閏月制郊十二鼎廟廿一鼎常祀十鼎當沿此鼎記廿數之制特擬議以存一說若此鼎則三足已殘其二幸遇良工補完兩耳已傷其右尙未至於斷折器爲城南王莊吳氏家藏

商父辛爵



父辛

按商器款識父辛最夥有立矛父辛鼎立戈父辛尊父辛彝父辛卣父辛觶父辛匜父辛鬲具載辭氏阮氏款識卽以爵論有辛父辛爵丙父辛爵子壬父辛爵拱井父辛爵此爵則止父辛二字上作雙柱如蓋前流後尾三足皆三稜腹圍作雲雷饗饗紋旁作一盞上銜龍首銘在盞裏腹間通體光黑如漆絕無青綠傳家舊也器藏王莊吳氏

商析父己觚



析木形孫子

父己

按積古齋款識有商析父已解其銘字全與此同但此為觚耳銘在口內兩行直下首一字作鼎乃析木形也次曰孫子曰父已再按趙太常摹本有析孫子父乙啟其取義亦同此器亦通體黝然如漆亦吳氏家藏舊物

周魯公觚

王尊彝
田公之文

王尊彝
魯公作文

儀徵阮文達公有魯公鼎文曰田公之文王尊彝又有亞形魯公鼎文全同惟反文從左向右讀此觚銘

亦右行也銘在觚足內直分兩行頗有剝蝕田即古魯字其魯公鼎阮氏以為伯禽之器此魯公觚銘既無異想亦當然且凡觚制卿士大夫其四角觚稜皆自足至腹腰而止惟國君觚乃直上達與口齊此觚四稜通徹螭皆重臺國君制也器亦吳氏家藏

申洗




申

右洗口面徑九寸高四寸兩旁有虎耳底上作申字

其下作鼎形斑綠半揜不可摹器藏和莊李氏

重侯南呂戈 摘摹





此乃廟祭儀仗之戈也路史國名紀有重氏羅泌曰滄之南皮有干童城年表云故重是也城在今無棣

按漢無棣今為鹽山縣其干童城即舊縣鎮本屬滄州 國朝雍正初始撥歸鹽山所謂故重也而此銘左加邑旁則猶燕之作鄴息之作即明其為邑耳漢書王子侯表有重侯劉擔河間獻王子也史記作搖亦作陰而此戈侯名二字上作器形中作魚依文當作魚字書不載殆亦如弘農王倪魚未詳音義者也次作帖穀梁莊二十七年傳未嘗有帖血之盟讀如帖也其曰南呂戈者乃秋嘗廟祭所舞之戈禮月令仲秋律中南呂言舞是戈以應南呂之節也廟祭用戈者書顧命四人綦弁執戈上刃夾兩階阼是也故

曰孝于大宗大宗者祖廟也亦猶兌戈和弓陳于兩序耳器為雙碓莊李氏家藏文皆陽款

漢貨布泉範



漢書食貨志天鳳元年罷大小錢改作貨布其圓好足枝具詳分寸以慮僂銅尺量之允合此乃其鼓鑄之模範也四劓皆有札牡子口城南吳氏藏器

趙敬仙造像殘石 拓摹

妙常李拂
勒銘云爾
惟聖潛軀惟賢
慕上想靈容黃金
乃布鑄形琬琰彫
儀繪素履載羣生
丹梁永固

邑人王仲悅
邑人王石保
邑人趙

像主趙敬仙

光緒十七年舊縣鎮農人掘土得造像殘石其正面
佛像凸起約寸許左側近邊處有像主趙敬仙等字
相其字體當在東魏以後北齊周隋之間以其與孟
阿妃仲思邨等刻筆意相似也銘詞八句只剩一字
其前記文則只存八字其題名在記銘下者才存四
人實止兩人姓名可辨其石為和莊李響泉購得今
存其家

齊翟刀文造像記

天保九年八月廿六日
滄州洛


陵郡平昌縣像
主翟刀文供養
侍佛時

光緒八年太平店人穿井得白石造像高不盈尺寬

四寸厚二寸許右側刻字四行背面刻字五行共二十七字今存太平店張氏家按北魏孝昌元年復置重平縣東魏天平元年又析置胡蘇縣至北齊天保四年乃以重平省入平昌而胡蘇亦廢是縣境併入平昌矣故此刻於天保九年徑稱平昌縣以明重平已撥附平昌而去其籍非復胡蘇之舊也蓋自此直至隋開皇中始復置胡蘇縣若此時正屬樂陵耳與北史可互相發明

平昌即今德平縣乃甯津東南鄰封也

貞觀筆洗



黃石筆洗作荷葉形石質頗堅虛中可以盛水款識
五字在內張秀莊人掘土得之藏李氏家

王神鼎造像

大周陸曆三季三函
廿七◎王神
為亡考妣
兄弟及妹
敬造彌勒
像一軀上

為因皇帝主下為七
先亡合家供養

此唐武后時所刻也武后於天授元年九月改國號曰周嗣於神功元年狄仁傑勸武后召還廬陵王次年戊戌遂改元聖歷其聖作璽亦作璧乃武后所製字猶之日作㊀年作羣君作鬲臣作思人作至初作廔等類皆武后製字也此刻因亦即武后國字若此

云聖歷三年三月武后製月字異文有二一作因一作匝此作匝與大周泰山碑正同
攷聖歷元年為戊戌至三年庚子五月改元久視此在未改元前故稱三年

唐樂陵丞何公墓誌

唐故廬江郡丞奉郎行樂陵縣丞攝樂陵縣令賞緋魚袋何公墓誌銘并序

奉義郎試博州長史李元渝撰

公諱載其先周成王母弟唐叔虞後本封於唐子孫分散今德州安德縣有何氏焉曾祖察 皇汝州鄆城縣令祖遇 皇博州錄事參軍並抱德懷才位不

充量父仙雲性好典墳閑居樂道逍遙養德琴酒自
娛公幼而有禮長而無竟行敏於寔言文誠於沈醉
讀書甚解作判弥工年纔強仕敲策於橫海軍節度
使程公公之用賢言刈其楚解褐奏綬景州叅軍入
作爪牙出為襟帶在於公庭實允時事一行景城縣
尉又行樂陵縣尉又行樂陵縣丞攝樂陵縣令政聲
遠播清白傳芳製錦宣風寔資廉察曰公事解又充
節度要籍權知市事既主要務奉公無私闖闖駢闐
商賈霖集可為當代之君子矣未登傳家之年忽然
秋夜長哉時年六十有七以元和四年秋八月庚辰

終於私弟公之臨終飭其子曰吾聞人無常居因地
為利可於庄所擇不毛之地而葬我焉長子仲昌仲
均次仲堅仲筥等哀毀過禮順乎其至夫人任氏哀
切撫孤愴深從子蕢尙之正不虧受吊之儀穆伯之
妻能知晝哭之禮冬十有一月庚申葬我公於臨津
縣崇孝鄉張司馬村之原禮也二三子恐陵谷變移
口請誌云尔

肅肅我祖兮本宗於周 繩繩子孫兮累代王侯
穆穆何公兮席上之珍 駟鷄撫俗兮當代人倫
已矣哉 秋夙明月終閉峴山之墳

右誌石方徑一尺一寸五分刻字二十行光緒初在南皮縣劉福卿莊出土 按甯津自唐天寶元年改胡蘇爲臨津至憲宗元和四年已越六十八年今甯津與南皮接壤以蕭家橋爲分界而劉福卿莊尙在蕭家橋北廿里許可知古臨津地所轄尙廣也自宋熙甯六年裁省臨津入南皮而甯津北界遂揜沒於南皮者多矣如漢臨樂故城乃在縣境極北之耿家圈卽雋不疑墓亦在縣北大柳鎮知當日破疆必跨入今南皮地也似此何載墓誌尤其顯然可證者故縣境北鄙之臨津店現亦在南皮界中

王二娘造像記

維大

元三年

月十七日

王二娘為

亡父敬造

彌勒像一

鋪上為國王帝主下

為七世先亡
見存母許息大龍女
張女含

首行缺二字一朝代一年號按北朝魏及東西魏北齊北周與隋年號皆無第二字用元字者以前漢晉雖有而此稱王二娘決非漢晉可知也惟唐高宗肅

宗俱有上元餘若開元貞元未知何屬總之不離乎唐尚為近是

宋鐘樓鐘款


鐘在鐘樓張家莊字多剝蝕惟末一行有大宋熙三字尚分明蓋宋熙甯年間鑄也

金阜昌鐘款

鐘高約七尺銘文曰鑄鐘都維那頭功德主阜昌三年八月初五日勅興縣從上第一弓手郎級時京妻李氏男時宥合宅此數行尚可識餘皆模糊難辨

按阜昌乃偽齊劉豫之僭號鐘重四千四百餘觔

金大定
孟蘭盆
拈募



同治七年戊辰邑人浚廢井得古瓦盆重唇平底外
 廓已缺口與底皆徑尺有二寸唇高二寸餘盆內左
 半有字三行云大定十八年七月十五日造文右行
 讀又斜刻石二郎記字於下乃就泥坯抹劃而後入
 窯者右側戊辰出土四字筆畫微瘦今藏和莊李氏
 按此乃孟蘭盆也以其日知之金史世宗紀大定十
 八年三月乙巳命戊邊女直人遇節辰許自造酒祭
 祀故此於中元亦自造盆致祭也而所云戊辰出土
 今於浚井得之亦適遇戊辰年是豈果有數乎

元延祐銅權



右銅權高營造尺三寸五分重庫平十九兩餘通體有字或嫌斑鏽揜文令愴以錯鑣之故字多闕今藏張遜庵家案延祐乃元仁宗之改元也

明清明寺鐘款

鐘在縣北清明寺其銘漫漶難辨或磨以石乃僅辨

宏治十七年四月吉日造金鐘重二千五百觔等字餘皆模黏

明龍泉寺鐘銘

龍泉寺舊名海螺寺此鐘乃嘉靖年間所造銘文曰皇風永扇帝業遐隆佛日流輝法燈遠照

明逸家廟鐘款

鐘在縣東逸家廟銘文曰甯津縣城東逸家廟同共發心曰三寶佛門正好修一文喜捨萬文酌與君寄在堅牢庫生生世世福無休萬曆二年三月十六日造

甯津縣志卷十一

光緒二十六年重修

雜稽志上

事略

今甯津四境在昔爲三縣交界之區其東北一帶乃漢臨樂侯國後爲新樂縣而西境則胡蘇亭地後爲胡蘇縣又爲臨津縣若南半則重平縣地後省入平昌雖故治在德平境內而其北半則在甯津南鄉也其間瓜分牙錯或併入或裁出或建侯或移治事蹟頗繁乃舊志一無所述殊爲缺憾茲特歷稽前史旁證羣編摘其大端與縣境有關者采輯二百餘條悉

仿通鑑綱目體例創為事略而

本朝事蹟繼之俾食毛踐土於斯者有所考鏡而稟承

焉志事略

唐虞

庚寅帝堯七十五年

舜居攝三年

命司空禹治河

按通鑑帝王年表以舜攝位在七十三載丙辰則七

十五載為戊午茲從竹書紀年禹貢九河既道

爾雅釋九河曰徒駭太史馬頰覆鬴胡蘇簡絜鉤

盤鬲津皆禹所名也此乃甯津地名之最初見者

故後世以胡蘇鬲津置縣

夏

丑乙帝相二十八年寒浞子澆篡逆后緡歸于有仍伯靡

出奔鬲

按路史國名紀有鬲氏夏諸侯近鬲津故名德之安

德有故鬲城漢置鬲縣此即今甯津鄰封德平縣

也彼時甯津固亦在鬲界中

此據竹書紀年帝相元年戊戌推知李兆

洛紀元編亦從之若通鑑則元年為乙亥特附辨存覈

甲辰少康使汝艾伐過伯靡自鬲帥斟鄩斟灌之師以伐

浞殺澆

按左傳襄四年有鬲杜註今平原鬲縣即德平縣東

一里故鬲城 此條仍據竹書在甲辰年明年乙巳伯靡始殺寒浞少康自綸歸於夏邑丙午即位為元年而通鑑以自鬲滅浞在少康四十年次壬午學者參觀可也

商

甲辰祖乙九祀圮于耿徙都于邢

綱鑑前編邢在邢州龍岡縣即今順德府邢臺縣也

甯津在商時本居侯服因遷邢乃隸甸服故記之

自此又百十五年至盤庚遷殷仍還侯服也

周

巳未定王五年 魯宣公七年齊惠公七年 秋河徙

按周譜定王五年河徙上距禹河功之成凡一千六

百七十七年禹貢錐指河徙自東光南皮 甯津

地形據胡蘇鬲津之間東光南皮皆相接壤爾時

應屬齊地

癸丑靈王二十四年 魯襄公廿五年齊莊公六年 秋八月諸侯同盟于

重邱

按杜注重邱齊地應劭曰在安德縣即今陵縣北五

十里重邱城屬德州故春秋傳說德州有重邱城

或云會盟處按德州東北與甯津西南接壤又在

安德之北可知其為鄰界水經屯氏別河南瀆又

東北經重邱縣故城西酈注引春秋同盟重邱為

證卽指此與聊城重邱別

王敬王三十一年魯哀公六年三月王命虢旅爲鬲攸鬲從

分田

按積古齋鬲攸從鼎銘釋文鬲爲夏侯國以近鬲津

名攸從鬲二子也其虢旅當卽鑄大林鐘之虢叔

旅此解甚明惜引而不發愚故知銘稱三十一年

者乃敬王無疑考春秋以前周王在位有三十一

年者凡七成昭穆宣平襄而後惟

敬王四十四年而於三十一年命虢旅則尤有號

叔大林鐘可證夫大林鐘之製前此絕無自景王

二十四年始而明年已薨子敬王立若虢旅則亦

號叔之後左傳僖公五年晉滅虢虢公醜奔京師

夫號爲周同姓既歸王朝見景王所製大林鐘因

尤效之更爲有據故於敬王三十一年適值鬲攸

鬲從分田遂命虢旅治其事也此則據鐘鼎款識

藉以引證經文且知鬲至春秋其苗裔猶有通籍

於王朝者

庚戌趙武靈王十五年張儀說趙割河間以事秦

按趙策高誘註趙至戰國河間勃海皆所侵疆甯津

夾九河而居近勃海而偏可覘形勢

王趙惠文王二十年趙將廉頗東攻齊破

其一軍
按燕山叢錄甯津縣有大麻子樹在曹家莊藥王廟
前輪困數抱嘉靖七年枯死居民伐之於根下得
石刻云廉綱斬迤南大麻子樹下相傳綱是廉頗

子此樹蓋自戰國有之矣觀此雖不詳其事由要
可據其人地蓋甯津在戰國時正當齊趙之交也

七國

甲寅趙孝成王與燕王喜易土趙以臨樂與燕

按此乃縣名之所昉至漢遂啟侯封也見史記趙世

家一統志通志皆云臨樂故城在甯津縣北卽今俗名耿家園是也而史記正義乃以同安臨鄉當之謬矣詳見古蹟臨樂故城本條下

秦

甲子始皇十年齊人茅焦說秦王

按魏書地形志饒安有茅焦塚寰宇記曰在甯津縣

一統志畿輔通志又皆云在甯津縣北其實一也

考北魏滄州饒安縣其故治在南皮縣東南八十

里而今南皮城南至甯津界不過五十里是塚在

甯津縣北明矣別詳陵墓本條下

庚辰始皇二十六年分郡置郵十里一亭河間有胡蘇亭

按說文亭民所安定也釋名亭亭停也行人所停集也

故有亭長其名胡蘇以亭在胡蘇河上也今縣西

保店卽胡蘇亭舊趾

辛卯始皇三十七年帝出巡游至平原津

按通鑑胡三省註班志篤馬河至平原東北入海此

甯津果志 卷十一
蓋津渡處卽今縣境之毛河以其自平原城北首受大河故瀆故曰平原津而甯津亦舊隸平原也
楚漢

乙未楚義帝元年項王以南皮旁三縣封陳餘

按史稱項羽聞陳餘在南皮故以南皮旁三縣封之

今以漢地志核之南皮東旁爲高樂縣後漢省入南皮西

旁則東光縣南旁乃臨樂縣也卽縣境若北則勃海

郡矣今滄州故云旁三縣

前漢

巳亥高帝五年置勃海郡屬縣二十六其三曰東光以胡

蘇亭屬之十六曰臨樂十八曰重平

按胡蘇亭今甯津縣西境也臨樂今甯津縣東北境

而東界樂陵北界南皮者也重平今甯津縣南境

而東南與鬲般接壤者也皆同時所置但南皮與

臨樂重平俱隸勃海郡而樂陵及鬲般則俱隸平

原郡其東光南皮樂陵至今仍舊名而胡蘇臨樂

則今爲甯津卽重平北界亦入甯津其鬲般則在

德平也然亦就漢鬲縣言若古鬲國甯津亦在內

乙卯武帝元朔三年四月封中山靖王子劉光爲臨樂侯

大清一統志臨樂故城在今甯津縣北李氏地理今

釋並同詳見古蹟

壬元封二年夏塞瓠子河決導河北行二渠

按史記溝洫志後河復決於館陶分爲屯氏河卽縣

境古毛河也詳河渠考

甲元封四年臨樂穆侯劉光薨

丙元封六年憲侯劉建嗣封臨樂侯

按漢書王子侯表憲侯建薨乃列侯固嗣以失年月

故附注之

丁昭帝始元三年遣祠鳳凰於東海

按今甯津縣西北有鳳凰臺在耿家園西卽臨樂故

城此時正臨樂侯劉固當國故築臺以表瑞

丙宣帝五鳳三年節侯劉萬年嗣封臨樂侯

按此後侯表但云侯廣都嗣至王莽篡位絕亦失受

封年月

壬成帝建始四年河大決於館陶及東郡入平原千乘

濟南凡灌四郡三十二縣水居地十五萬餘頃壞官

亭民舍四萬餘所

甯津在平原下流成澤國矣

甲鴻嘉四年勃海清河信都河溢灌縣邑三十一敗官

亭民舍四萬餘所

見漢書溝洫志

時孫禁欲決平原金隄開通大河令入故篤馬河而許商以為古說九河

有徒駭胡蘇鬲津今見在成平東光鬲界中自鬲以北至徒駭相去二百餘里河雖數徙不離此域孫禁所欲開者在九河南篤馬河失水之迹淤絕易敗不可從皆遯商言

己巳新莽始建國元年改臨樂縣為樂亭縣

水經酈註臨樂更名樂亭王莽時名也

庚午始建國二年莽廢漢諸侯王為民於是臨樂侯劉廣

都廢絕

自元朔三年始封至此國絕共歷五侯通計一百三

十六年

辛未始建國三年使韓牧穿九河故道

按縣境及鄰封每有王莽河名即韓牧所穿者

辛巳地皇二年平原女子遲昭平聚眾稱兵縣民多為驅

迫

癸未帝元更始元年新莽亡以大司馬劉秀遣徇河北

諸郡卜者王郎稱帝於邯鄲幽冀騷動

甲申更始二年夏拔邯鄲斬王郎定涿郡中山鉅鹿河間

二十二縣冬蕭王自徇燕趙

東漢

丁酉光武帝建武十三年封建義將軍朱祐為鬲侯

見水經注

以河間屬信都今冀州而臨樂遂亦裁省重平亦廢併

入高

按自此直至漢末甯津四境皆分併於南皮樂陵高縣東光界中故從略不記

辛未 獻帝初平二年十一月黃巾與黑山賊合寇勃海公

孫瓚逆擊于東光追至般河大敗之

按般河一作盤河即鉤盤河漢置般縣其故城在今德平縣東北

此時東光固兼有胡蘇亭地正當縣境

甲申 建安九年十二月曹操攻平原拔之袁譚走保南皮

乙酉 建安十年操克南皮斬袁譚復置臨樂縣改名新樂

按新樂之名漢志固無有而晉志則有冀州樂陵國

新樂縣北魏亦有青州樂陵郡新樂縣即南朝劉

宋亦載冀州樂陵郡新樂縣名皆今甯津縣也計

自建武十三年至此建安十年縣境中遭廢絕者

凡一百六十七年

王辰 建安十七年河間民田銀以操西征遂擅動幽今順天

冀州今冀州操子丕遣賈信討滅之各屬震驚

癸巳 建安十八年夏以冀州河東等十郡封曹操為魏公

乃分平原置樂陵郡領縣五新樂屬焉

按冀州河北諸郡縣從此入魏不屬漢矣

晉

丙戌 武帝泰始二年封諸王以郡為國於是置樂陵國仍

統縣五新樂居四

庚申 惠帝永康元年趙王倫專政孫秀矯詔殺潘岳石崇
歐陽建等

按寰宇記馮翊太守歐陽建墓在臨津縣東偏二十

七里此臨津縣乃今保定以樂史原宋人也通志

一統志皆載之

乙亥 愍帝建興三年石勒襲邵續於樂陵續逆戰大敗章

武人王春起兵於科斗壘擾亂河間勃海諸郡

東晉

巳卯 元帝太興二年十一月石勒僭即趙王位魏汲平原

勃海河間二十四郡皆屬之

自此河北為趙所據

庚戌 穆帝永和六年燕王儁擊趙取章武今滄州東河間慕容

評徇勃海獲賈堅以為樂陵太守新樂乃屬邑

癸未 孝武帝太元八年燕使慕容垂鎮慰河北

自是河北又為後燕所踞

甲申 太元九年秦苻堅以信都高城降燕

信都今冀州在甯津西高城今鹽山在甯津東舉其兩端而其中之州縣皆降可知矣

丙戌 太元十一年後燕建興元年慕容垂稱帝定河北州郡

附志是年代改稱魏為拓拔珪登國元年

戊安帝隆安二年張超據南皮自稱烏桓王魏王珪命

庾岳討平之

縣境與南皮唇亡齒寒實為偏處

北魏

丙孝文帝太和十年分置州郡在河北者十三州乃以

樂陵國仍改為郡隸青州所領五縣新樂次四

丁太和二十一年發冀定瀛等州兵以伐齊

乙宣武帝延昌四年六月沙門法慶以妖術惑眾反於

冀州殺阜城令瀛滄震駭元遙討平之

魏自太和丙子改姓元氏

按三年沙門劉僧紹已聚反於幽州此又繼起雖亦伏誅而餘黨於明年復寇瀛州焚燒齋閣蓋此

時正當梁天監年中故佛教為患未已

丁明帝熙平二年幽冀滄瀛皆饑遣使巡撫開倉振恤

乙孝昌元年太后復臨朝詔下州郡於是復置重平縣

改隸滄州安德郡其新樂並裁入

按重平故治在今德平縣極西北界與甯津原接壤故統志通志於甯津沿革皆載有重平縣名蓋德平分重平之南半甯津分重平之北半此固自漢高帝五年分置州郡時所定若此次並裁新樂入重平則併甯津腹地皆包矣直至東魏立胡蘇縣始復還清舊域也

戊莊帝永安元年河間邢杲率河北流人萬餘反於北

海今青州壽光地進攻濟南德棣皆驚奸民四應明年二月

始降而斬之

東魏

甲寅 孝靜帝天平元年遷都于鄴詔勃海王高歡留後部

分歡乃以東光縣為勃海郡治而析胡蘇亭地置胡

蘇縣盡復新樂疆界

按魏書地形志曰永安末年胡賊入洛官司文簿散棄者多往時編戶全無追訪今錄武定之世以為志焉州郡勅改隨而注之不知則闕觀此可知郡縣沿革頗有闕遺如此胡蘇縣固歡所置宜魏志不及載也

是年令瀛滄幽青四州之境煮鹽置竈

按食貨志滄州置竈一千四百八十四瀛州置竈四

百五十二舊志稱甯民隸竈籍者三十六戶當肇

端於此

北齊

癸酉 文宣天保四年齊主北巡冀定諸郡以重平省入平

昌而胡蘇以廢

丙子 天保七年以鬲縣併入安德路史國名記

按安德即今陵縣蓋縣境之此分割盡矣

庚辰 廢帝乾明元年夏冀趙瀛滄等州蝨水傷稼遣使分

塗贍郵

隋

己酉 文帝開皇九年析置州縣以館陶所分屯氏河誤為

毛氏河遂置毛州

按此乃甯津毛河稱名所由來然至大業初毛州已廢仍改館陶

丙辰開皇十六年復置胡蘇縣屬平原郡隸堯州

按是年並析樂陵縣地置鬲津縣然不久至大業初已廢方輿類纂曰廢鬲津縣在樂陵縣西南與胡蘇縣接壤

辛酉仁壽元年六月詔廢太學及州縣學河間劉炫切諫

不聽

接近時州縣每有書院義學不完者皆自此為嚆矢

丁卯煬帝大業三年詔安輯河北巡省趙魏夏四月車駕

北巡

按方輿紀要甯津縣北三十五里有隋隄相傳煬帝

曾駐蹕於此令軍士築隄以防河今名耿家圈當

是北巡時事

愚按耿家圈實漢臨樂侯國故城周十餘里歲久頽圯至隋因就築為隄

耳辯見古蹟臨樂故城本條下

戊辰大業四年正月詔發河北諸郡男女百餘萬開永濟

渠引沁水南達于河北通涿郡民死于役者過半

癸酉大業九年春賊帥杜彥永陷平原屬縣驚潰

胡蘇正為所屬

按前於七年鄒平賊王薄已聚眾於長白山

在濟南長山縣

平原賊劉霸道亦聚眾於豆子畝

在平原東時出劫掠

縣民多被其害至是遂陷

乙亥 大業十一年春上谷賊王須拔等北連突厥南寇燕

齊河間格謙號燕王勃海孫宣雅號齊王殺奪橫行

民無安堵故於二月詔村隄皆築城

今各縣村莊許築圍牆由此起例

丁丑 大業十三年竇建德稱長樂王隋長樂今冀州入河間定都

樂壽今獻縣河北盜賊蠡起縣境騷然

此後建德自稱夏王縣境已為所轄復取邢滄等州直至武德四年禽斬建德縣境始歸于唐也

唐

辛巳 高祖武德四年秦王既擒建德以胡蘇縣改屬觀州

按觀州即東光開皇九年所改置

八月庚寅劉黑闥陷瀛州連陷觀州民皆東逃

按此時胡蘇正屬觀州

癸未 武德六年又以胡蘇縣改屬滄州兼移滄州治焉易

名安水郡

按甯津舊碑每有安水之名當原於此徙滄州治時

也第為時無幾甫經五載已復還治清池是以唐

書地志亦不載安水之名以其日淺治僑故略而

未記耳

丁亥 太宗貞觀元年分天下為十道以河北道治魏郡領

瀛冀滄德諸州而以滄州治清池其胡蘇還屬觀州

癸卯貞觀十七年觀州廢仍以胡蘇屬滄州

丙申中宗嗣聖十三年契丹孫萬榮攻陷冀州又攻瀛州

河北震動

壬戌元宗開元十年滄州刺史姜師度開濬古毛河自胡

蘇經南皮入清池

丙寅開元十四年於滄州置橫海軍以備突厥

此時胡蘇猶屬滄州縣境舊有軍籍應始於此

戊辰開元十六年以宇文融充九河使請墾九河故地為

稻田事迄無成民皆怨詈

戊寅開元二十六年奉敕建縣鄉學塾

自仁壽元年詔廢州縣學至此始建中絕一百三十七年

壬午天寶元年以胡蘇縣改名臨津縣

乙未天寶十四年安祿山反河間司法李奐等殺祿山所

置官吏推平原太守顏真卿為盟主起兵討賊河北諸郡皆應之

丙申天寶十五年十月賊將史思明攻陷常山太守顏杲

卿死之河間李奐景城李暉皆死於是河北諸郡聞

風瓦解百姓流離

丁酉肅宗至德二年祿山死史思明以所部來降滄瀛德

棣等州復歸河北

戊乾元元年思明復反陷魏州徵調無已民不聊生

是年置觀察使

按甯津有察院行臺舊址應起於此宋元皆因之

乙卯代宗大曆十年魏博節度使田承嗣反陷瀛滄衛冀

李寶臣攻滄州吳希光以瀛州降民多逃散

前於廣德二年以國用急不及秋苗方青即征之沿至大曆七年河北復大旱而且兵革頻仍亦危急存亡之秋也

丁卯德宗貞元三年以臨津改屬景州

兵志是年於橫海軍置節度使領滄景二州此時景

州仍治弓高

己巳貞元五年分景城弓高為景州除刺史

辛丑穆宗長慶元年景州廢以臨津還屬滄州

壬寅長慶二年春正月盧龍兵陷弓高既平復於弓高置

景州以弓高東光臨津南皮等縣屬之

丁未文宗太和元年橫海節度使李全略子同捷權知軍

務擅據滄景不奉詔發諸道兵討之縣境亂

己酉太和三年橫海節度使李祐帥諸道兵擊同捷夏四

月同捷降滄景平

庚戌太和四年又廢景州仍以東光臨津等縣屬滄州

乙亥宣宗大中九年夏閏四月詔州縣作差科簿

通鑑綱目詔以州縣差役不均自今每縣據人貧富及役輕重作簿送刺史檢署訖鎖於令廳每有役

事委令據簿輪差

按今凡州縣車船夫馬工程諸差莫妙於此皆有底簿按次輪流衙胥雖欲嚇詐賣放袒護偏枯亦無所施其技如真秉公據簿輪差民心自然悅服

丙申 僖宗乾符三年二月令天下鄉村各置弓刀備盜

按是時濮州人王仙芝冤句人黃巢皆起於河北作亂於四方

乙巳 光啟元年滄州軍亂逐節度使楊全玖立牙將盧彥威為留後縣境戒嚴

壬子 昭宗景福元年復於弓高置景州而臨津猶屬滄州

戊午 光化元年三月幽州將劉仁恭取滄景德三州以其

子守文為留後

庚申 光化三年朱全忠拔德州 按唐宋金元德州皆在陵縣治與臨津南北相連若

今濱河之德州乃明所移者 攻滄州敗劉仁恭于老鴉隄 青縣地 復

取瀛景莫三州

丙寅 昭宣帝天祐三年劉守文遣兵攻貝州 今清河縣 又攻冀

州拔薊縣 今景州 進攻阜城瀛滄告警

五代

乙亥 梁末帝貞明元年晉王李存勗取德州

按五代德州治陵縣與縣境南北毗連而彼時陵縣則治今德州至前明始將德陵兩相易地如今治

戊辰 後唐天祐五年以臨津改屬景州而景州則移治於東光

庚午 天祐七年劉守光攻克滄州殺其兄守文縣境戒備

壬申 天祐九年楊師厚急攻棗強拔其城屠之復與賀德

倫圍舊縣而史建瑋率百騎乘夜縱火大譟梁王燒

營遁去瀛滄景德諸州逋逃殆盡

丙申 後晉天福元年契丹立石敬瑭為晉皇帝敬瑭遂以

幽涿薊順瀛莫等十六州為賂

按此時臨津屬河間瀛州既去縣境亦隨陷入契丹矣明年丁酉契丹改國號曰遼

庚子 天福五年何建為貝州節度使於臨津西境立砦與

契丹分防

按何建砦俗名何家砦在縣西迤北三十五里

甲辰 後晉開運元年正月遼攻晉邢滄等州四月陷德州

晉主自將遼兵解去縣境空虛

壬子 後周廣順二年遼攻莫定諸州又攻樂壽今獻縣滄德

各屬倉黃失措

丙辰 顯德三年敕漳河以北鄉村並許鹽貨通商逐處有

鹹地任人煎煉但不得踰漳河入不通商之地

按貧人刮鹽熬鹽自古已然乃至罪為私煎沿為厲禁徒飽商橐亦獨何歟

己未 顯德六年周主親征由滄州獨流而西復取雄霸瀛

三州

按自是縣境復還隸於河北蓋中沒於契丹者二十四年

宋

庚午 太祖建隆元年臨津仍屬滄州景城郡橫海軍

按宋史地理志曰縣建隆初至治平末州郡沿革無大增損

壬申 建隆三年命馬仁瑀守瀛州以拒契丹縣境十室九

空半由遷實

丙戌 太宗雍熙三年契丹大舉入寇瀛州部署劉廷讓逆

戰於君子館今河間肅甯地廷讓大敗脫走而邢深德州遂

相繼陷

癸巳 淳化四年詔河北屯田用實軍廩以臨津令黃懋充

屯田判官

按黃懋為臨津令初上封事盛稱水田之利故所經畫悉如懋奏

己亥 真宗咸平二年契丹入寇以知景州楊延昭拜莫州

刺史今任邱鄭州尋進團練使

按今甯津東有楊盤鎮即楊延昭團練營盤處也

甲辰 景德元年契丹攻滄州又攻瀛州復侵冀州冬大寇

澶州帝自將禦之民間困苦難言

管子
卷十一
五
戊子仁宗慶歷八年始置高陽關路以瀛莫冀滄永靜乾甯等處屬之

按高陽關卽今河間府城

庚子嘉祐五年春河北都轉運使韓贄奏請鑿二股河

按二股河一爲縣南土河一爲縣西老黃河也

戊申神宗熙甯元年河決冀州棗強埽又溢瀛州樂壽埽

今獻縣自德至滄東流分股侵害民田司馬光等集議

言滄德界有古遙隄當加葺治

按行水金鑑甯津縣西二十里有古黃河自吳橋入境又北入南皮廣可二里兩岸廢隄隆然峭立居人謂之卧龍岡卽温公所謂古遙隄也

己酉熙甯二年免河北歸業流民夏租九月出內庫緡錢

百萬糴河北常平粟

癸丑熙甯六年偃行青苗新法以臨津縣省入南皮名其

地爲保安鎮

按德平縣亦同時省入安德

丁巳熙甯十年諸州商稅歲額五萬貫以上滄二十二務

按此時臨津雖廢而商貨仍由滄州權稅

戊午元豐元年詔滄屬被水災民以常平糧貸之又濱棣

滄等州竹木魚果炭箔稅不及百錢者蠲之

辛酉元豐四年夏築河隄自大名至於瀛州派夫騷擾

王元豐五年九月河溢滄州南皮上下埽又溢東光下埽縣境被水

甲哲宗紹聖元年十月黃河東還故道北流障塞

戊徽宗大觀二年以高陽關路升為河間府滄州南皮

隸焉

甲宣和六年河北盜高托山山東盜張仙聚眾剽劫民

不安生

丙欽宗靖康元年二月更以肅王樞為質於金康王構

還至磁州

按舊志古蹟有康王祠而以泥馬附會其說云在縣境茲不具論辨見古蹟本條下

丁靖康二年正月詔兩河民降金民不從四月金劫二

帝北去宋南渡 五月康王即位於南京改元建炎

遣馬忠趨河間以擊金軍 八月金人盡陷河北州

郡河間諸屬皆闡母所下

從此河北盡為金有非宋所及只可據實直書以清眉目且金亦自有專史也

金

丁太宗天會五年宋建炎元年秋復置臨津縣還其舊城

戊天會六年宋建炎二年秋大水臨津城圯乃東徙二十五

里為治改名甯津即今治然此時草創初遷並無城郭

巳天會七年宋建炎三年析河北為東西路東路于河間置

總管府而以甯津屬景州又於甯津立三鎮曰西保

安曰廣平曰會津

九月下髡髮令易服色

庚天會八年宋建炎四年九月金立劉豫為齊帝都大名府

紀元阜昌河間滄景皆屬之

壬子天會十年宋紹興二年偽齊阜昌三年夏劉豫徙居汴

按今甯津縣署前大鐵鐘視其款阜昌三年所鑄也載通志

巳丁天會十五年宋紹興七年劉豫廢徙臨潢時宋韓世忠岳

飛請伐金收復中原秦檜不許

己未天眷二年宋紹興九年以貞懿后弟李石為景州刺史

庚申天眷三年宋紹興十年始置屯田軍

按今甯津猶有營伍各莊名蓋起於此

戊申世宗大定二十八年宋清熙十五年上以鹽司官課素擾民

鹽乃別置巡捕使山東滄寶坻各二員其滄州二員

則置於深州及甯津縣秩從六品

癸丑章宗明昌四年六月河決衛州東流清滄皆被害橫

海軍節度使張大節循九河故道相宜繕隄水不為

災

按所修卽縣境黃河故道上接吳橋下達南皮者也

癸酉 衛紹王至甯元年 宋嘉定六年 蒙古圍金燕京拔河北河

東諸郡克觀州刺史高守約死之又破清滄景獻河

間以徇

按此時甯津隸景州而景州則治東光景州破甯津潰矣

甲戌 宣宗真祐二年 宋嘉定七年 金及蒙古平中都解嚴五月

金徙都汴

乙亥 真祐三年 宋嘉定八年 蒙古入燕清滄諸城望風逃棄

丙子 真祐四年 宋嘉定九年 同知觀州事張開復取河間府及

滄獻二州十有二縣 縣境在內

丁丑 興定元年 宋嘉定十年 蒙古攻金觀州 今東 縣境惶亂

己卯 興定三年 宋嘉定十二年 金河北地俱失 縣境隨陷

庚辰 興定四年 宋嘉定十三年 金求和于蒙古夏四月封經略使

王福為滄海公 以清觀滄州鹽山無棣樂陵東光甯津吳橋將陵阜城舊縣隸之

五月紅襖賊寇樂陵侵掠縣境王福擊敗之 八月

宋安撫使張琳攻滄州王福以城降蒙古

辛巳 興定五年 宋嘉定十四年 宋張琳以京東諸郡降元

元以琳為滄景濱棣等州行都元帥

元

乙未 太宗七年 宋端平二年 析臨邑甯津二縣地別置青城縣

俱隸濟南

按青城本青平鎮壤地褊小故割就近鄰封以益之今甯津東鄉猶有青積務卽青城屯積之處也
 丙太宗八年宋端平三年括民戶定租稅

按元年己丑始命河北漢民計戶出賦以耶律楚材主之至是乃具章程

壬憲宗二年宋淳祐十二年分漢地封宗室甯津仍屬濟南路

辛世祖中統二年初立勸農司以程邃崔斌等爲濱棣

濟南河間勸農使

壬中統三年李壇寇蒲臺詔順天河間諸路兵皆會於

濟南縣境畢作

甲至元元年定都於燕爲中都以上京人李世和爲甯

津邑長講求民瘼矜貸困窮得戶三萬餘

乙至元二年於河間路置總管府以甯津改隸河間其

青城縣亦來屬

癸至元二十年正月詔停燕南河北山東租賦

甲至元二十一年河間滄州等處置長官司秩正五品

又達魯花赤長官副長官各一員

按甯津北有鎮名長官卽當時長官所駐處

己至元二十六年開會通河橫截深川於清平魏家灣

築壩使水不入古深因名曰土河

按此乃縣境土河得名之始

己武宗至大二年甯津漫散戶長官李仲傑修復儒學

按臨津縣學自唐開元中已建因屢為兵燹所燬至此重修

壬子仁宗皇慶元年捕獲滄州羣盜阿實達等支解以徇

丙寅泰定帝泰定三年夏畿內河北山東饑命賑糧復免

保定河間及濟南等郡縣民半租

戊辰致和元年九月懷王遣使分行河間保定括民馬

丁酉順帝至正十七年夏紅巾賊毛貴克山東諸路趨齊

趙勢大振

戊戌至正十八年春毛貴破濟南轉而北戰由甯津以至

於南皮董搏霄死之

辛丑至正二十一年九月命孛羅帖木兒於保定以東河

間以南屯田

按甯津西南鄉有孛羅寨卽孛羅帖木兒屯田之遺蹟

丁未至正二十七年明大將軍徐達率師徇河北地連下

畿南諸郡邑副將軍常遇春陷長蘆扼直沽水陸並

進

明

戊申太祖洪武元年閏七月常遇春克德州縣境遂下十

月改河間路為府屬河南分省 詔京師設漏澤園

天下府州縣於近城隙地立義塚

按縣境漏澤園在邑厲壇東
義塚在西郭外皆當時所置

己酉 洪武二年合郡邑設行太僕寺置牧地責民間大戶

養馬於是甯津立馬廠 三月復以河間府還隸中

書省領州二縣十六甯津次十

庚戌 洪武三年知縣朱逢吉修治衙署建保釐堂又拓修

學宮及兩廡

壬子 洪武五年詔天下郡縣立孤老院以養貧民復改名

曰養濟院

按舊志孤老男
婦六十七名

乙卯 洪武八年奉部劄普立社學頒發卧碑

丙辰 洪武九年六月改行中書省為承宣布政使司於是

河間府屬皆隸布政司

庚申 洪武十三年三月燕王棣之國 七月詔天下學校

諸生給廩膳 生員補廩
食餼始此

辛酉 洪武十四年三月頒五經四書於北方學校

按今儒學皆存
有官書始此

壬戌 洪武十五年縣治東北海螺寺重修為習儀之所易

名龍泉寺

癸酉 洪武二十六年定天下都司衛所乃於甯津置千戶

所屬山東都司

丙子 洪武二十九年命燕王棣帥師巡邊

己卯 惠帝建文元年燕王靖難兵起河北逃散幾無子遺

庚辰 建文二年五月燕王陷德州進攻濟南州縣震懾

癸未 成祖永樂元年秋八月徙富民實北京

按此北京創直隸全省今畿輔自廣大真順河天以至京都大約土著甚少遷來者多蓋靖難一舉燕趙齊衛皆墟矣

己丑 永樂七年帝北巡狩次景州民疲于役

壬辰 永樂十年工部尚書宋禮請自魏家灣開支河二洩

水入土河復自德州西北開支河一洩水入舊黃河按土河在今縣南舊黃河在今縣西北減河合流也又太僕卿楊砥亦言德

州良店驛有黃河故道與土河相通請穿渠分殺水

勢按砥所請穿亦即縣南土河

癸巳 永樂十一年帝如北京令北京民戶分養孳生馬著

為令

按兵志曰凡牡曰見馬牝曰騾馬兒一騾四為羣立羣頭一人

乙未 永樂十三年以渤海鹽藪私販撓法特遣御史一員

巡視河間私鹽

辛丑 永樂十九年遷都北京議北征軍餉各縣派發民夫

丙午 宣宗宣德元年漢王高煦反帝親征由楊村青滄駐

蹕樂安今武定府高煦降乃班師循縣東境

丁英宗正統二年始令郡縣募民壯

按今壯班之設始此

庚申正統五年詔民間出粟助賑邑人耿思恭捐粟千四百斛有司上聞七年賜羊酒旌其門曰尙義

甲子正統九年於縣南開教場築將臺立演武廳

按是時烏梁海額森窺伺畿疆故勤武備

王申景帝景泰三年知縣謝聰始建城池兼修明倫堂

按自金天會六年甯津移治初無有城至此遭土木之變英宗雖還不可不設險以守國故築之

癸未英宗復位天順七年主簿王儼重修明倫堂

癸巳憲宗成化九年封代隱王子朱成鈇爲甯津王

丙午成化二十二年甯津王朱成鈇謚懷康

己酉孝宗宏治二年九月戶部侍郎白昂請於德州吳橋

修古長隄

按甯津古黃河隄自吳橋入縣境而達南皮即昂所請修者

庚戌宏治三年以懷康王子朱聰滴襲封甯津王

辛亥宏治四年甯津王朱聰滴薨

甲寅宏治七年知縣王輔重修學廨

丙辰宏治九年以鎮國將軍朱聰洽進封甯津王

庚申宏治十三年知縣孔公華以學宮狹隘偏在西隅相

東北雖窪可以填高乃改建殿廡堂齋有碑記

王 宏治十五年孔令復修繕城闔

庚 武宗正德五年流寇劉六劉七楊虎齊彥名等並起

殘破州縣畿南大擾知縣劉秉忠與邑人田鸞謀守

賊遁城全

辛 正德十六年以溫穆王子朱俊棣襲封甯津王

秋七月丁丑甯津盜起德平知縣龔諒死之

明史世宗本紀

按德平縣志龔諒蔚州舉人追盜被害

冬十月興獻后自安陸至京派夫供役

壬 世宗嘉靖元年知縣熊爵即太僕寺舊趾改建備豫

倉郡同知姜佐孫介修兩廡戟門櫺星門造祭器

甲 嘉靖三年重修衙署又重修西關禹王廟

辛 嘉靖十年知縣王三錫於縣境通渠洩水以備淫澇

甲 嘉靖十三年知縣鄭用時建啟聖祠敬一亭省牲所

各一區

丁 嘉靖十六年知縣葉紹先修補城闔添設敵臺腰鋪

清查社學

戊 嘉靖十七年葉令暨主簿解臣崇飾 文廟

復買民地置漏澤園

己 嘉靖十八年冬徵解折色馬

按通志御史陳修奏馬頗足用乞暫准徵解折色每匹銀二十兩以充沙河之役工完依舊解俵

辛嘉靖二十年流賊恣掠兵部馬不敷用五月遣太僕

寺丞齋官銀分派州縣買儀解大馬民多不堪

卯嘉靖二十二年知縣高儒鑿龍門穿渠通水

是年增設州縣民壯額

戊申嘉靖二十七年始行商鹽民苦之

按金史食貨志大定中已具私鹽及刮鹽土二法以上宰臣謂鹹土非私鹽可比上亦曰刮鹽非煎何以同私張仲愈獨曰若不禁止則渤海之人恣刮鹽而食將侵官課矣然當時猶行官鹽民雖覺病利猶歸上至是委之於商所交課於上者有限而賸削於民者無窮矣

庚戌嘉靖二十九年八月俺答大舉入寇掠通州駐白河

分擾畿甸州縣搖亂人心

丙寅嘉靖四十五年知縣姚良卿典史方子明重修文

廟有碑記

戊辰穆宗隆慶二年知縣寇靖修葺城垣加高培厚改用

甄堞

癸酉神宗萬曆元年知縣黃居敬創設學田有碑記

乙亥萬曆三年甯津王朱俊棨薨

按此後史無明文想非除卽絕也自成化九年始封

至此凡歷四王共一百有三年

己卯萬曆七年正月張居正惡人講學矯詔毀天下書院

辛巳萬曆九年五月詔令盡賣民間種馬折徵草場地租

按明初馬皆官牧後改民牧給以草場復爲豪右
侵奪馬戶遂多逃亡至是太僕少卿武金以互市
饒馬遂請盡賣之而草場亦折租銀謂可供團營
及各邊之請豈知馬戶既空草場亦竭罔政大壞

戊子 萬曆十六年知縣余鏗建魁星樓立鄉賢祠重修預
備倉復設社學在城四處四鄉二十四處

乙未 萬曆二十三年知縣馬懋修治儒學

甲寅 萬曆四十二年知縣張修德重葺學宮

乙丑 熹宗天啟五年七月壬戌詔毀首善書院八月壬午

並毀天下講學書院

按是時閣宦侵權儒臣盡去不但毀書院凡
講學處皆毀也於是縣境城鄉諸學俱禁閉

辛未 莊烈帝崇禎四年閏十一月登州游擊孔有德兵次

吳橋反遂陷陵縣連陷臨邑商河齊東斷絕行人縣

境大震

丙子 崇禎九年七月

大清兵入寶坻連下近畿州縣

壬午 崇禎十五年閏十一月

大清兵由薊州下畿南郡邑多不守

甲申 崇禎十七年三月流賊李自成犯京師丙午皇城陷

縣境聞風大亂

國朝

甲申 順治元年四月李自成奔山西五月

大軍定京師馳文到縣招撫官民縣境安堵如故

乙順治二年正月令無主荒地開具實數報部熟地錢糧照蠲免例如數開徵

六月下薙髮令衣冠如制

戊子順治五年河間一路土寇竊發

己丑順治六年三月令民間鳥鎗弓箭槍刀馬匹悉聽存留以資防衛

七月以蠱章京敦拜勦河間一路土寇

癸巳順治十年禁派丁鹽令商人設店運賣

六月改折本色錢糧歸一條鞭法總收分解永為例

己亥順治十六年設立鄉約申明

六諭

癸卯康熙二年禮部議奏鄉會考試停止八股文頭場策

五篇二場四書本經論各一篇三場表一篇判五色

以明年甲辰科為始

丙午康熙五年訓導康宏修學宮

戊申康熙七年七月命鄉會試復以八股文取士

己酉康熙八年六月上諭自後圈占民間房地永行停止

其今年所已圈者悉令給還

七月復存留錢糧以杜苛派

凡地方費用皆出此項

庚 康熙九年頒發

聖諭十六條

甲 康熙十三年知縣程裕昌纂修甯津縣志稿增修縣

治儒學

己 康熙十八年加鹽引

乙 康熙二十四年復廩生餼糧

庚 康熙二十九年弛養馬之禁聽從民便

己 康熙四十八年御史張邁奏准民間設立香會男女

混雜地方官所宜嚴禁又地方光棍於瓜果菜蔬私

立牙行勒捐商民應查明除革

丙 康熙五十五年二月令民間買賣地畝隨地輸課

癸 雍正元年九月部議將丁銀攤入田糧內以雍正二

年為始造冊征收

甲 雍正二年於城內首建義學四鄉亦各建義學

西相衙鎮南小店北大柳鎮

東柴胡店

頒發

聖諭廣訓萬言令正諭訓導遴選生員有品行文學者宣講

知縣甘國圖重修文廟有碑記

十一月定議分給各州縣官養廉

養廉銀始此

乙 雍正三年上丁祭始增太牢及祭器

雍正通志州縣舊無太牢至是始增置及俎豆籥舞諸器

是年奉行義倉社倉之法勸民積穀

五月頒發縣學

聖諭廣訓俾童蒙誦讀府縣考覆試時默寫一條方准錄取

辛亥雍正九年二月升天津衛為府以天津青縣靜海滄

州南皮鹽山慶雲屬之於是河間府祇領十一州縣

甯津次七

壬子雍正十年七月巡鹽御史鄂禮奏請裁汰利民阜財

等六場大使其竈課歸併滄州南皮甯津東光海豐

樂陵等十四州縣徵解

甲寅雍正十二年直督李東撫岳會議重濬北減水河

按此即由吳橋入縣境黃家鎮而下達南皮者也本宋北決之黃河而今借為減水河

乙卯雍正十三年十月奉

旨落地稅在城者照舊徵收在鄉鎮村落者全行禁革

十二月

諭民間買賣田房契紙契根之法永行禁止活契典業不必

投契用印收取稅銀

丙辰乾隆元年二月

詔生員監生年七十以上者優免一丁八十以上者給八品

頂帶

三月頒十三經二十一史於縣學

丁乾隆二年三月飭增孤貧口糧遇閏加給

四月以畿輔缺雨免今年額賦

五月

諭若值歉收之年所有借領倉糧之人非平時貸穀者可比

至秋後還倉時止應完納正穀不應令其加息將此

永著爲例

己乾隆四年三月特免額賦

辛乾隆六年知縣馬長淑挑灑水河

上自吳橋東北起
下至南皮東南止
卽老黃河也

乙乾隆十年普免正供錢糧

七月飭有司月給孝子節婦口糧

庚乾隆十七年知縣郝連修築城垣兼置義倉七所

乙乾隆二十二年十二月准收麩稅

辛乾隆二十六年改用小斗斗十升

癸乾隆二十八年正月濬河道

庚乾隆三十五年普免正供錢糧

三月廣學額

癸乾隆三十八年十月奉行保甲

丙乾隆四十一年廣本年學額

丁乾隆四十二年普免正供錢糧
巳乾隆四十四年頒

世宗憲皇帝第一道訓飭士子碑文於學

巳乾隆五十年九月考試二場論題奉以孝經與性理

按科輸出

戊乾隆五十三年九月禁州縣私立班館私置刑具

乙乾隆六十年知縣黃虞重修文廟

萬壽賜千叟宴畿輔耆老與宴者共三千三百一十四人

按甯津耆老得與宴者八人

丙嘉慶元年十一月普免正供錢糧

十二月賜高年頂帶

戊嘉慶十三年三月廣歲試學額

癸嘉慶十八年教匪竊起踞滑縣城畿南州縣戒嚴者

旬日

丙嘉慶二十一年二月知縣曾功傑重修文廟

甯津差役拏獲逆犯劉玉滌於樂陵

巳道光元年二月奉修復社倉義倉

壬道光二年正月申禁民間私藏鳥槍火器

乙道光五年知縣董瀾重修大成殿名宦祠創建魁星

閣文昌宮

戊子道光八年知縣楊德三改建文昌宮

辰王道光十二年山東德州第九屯御河東岸決縣西鄉

被災

鹽政鍾靈奏請裁汰興國場一缺其丁課歸併天津

靜海武清寶坻樂陵甯津等十二州縣兼管

巳亥道光十九年知縣潘任重修大堂

十月諭地方官朔望宣講

聖諭廣訓

寅王道光二十二年知縣于志瀛重修忠義祠倡修通德

橋

丙午道光二十六年奉減鹽引

丁未道光二十七年六月奉請旌之烈婦烈女年終彙題

均准建立專坊餘俱入總坊

庚戌道光三十年知縣蔣大鏞移建明倫堂

是年廢停譙閣晨鐘以巨鐘與大鏞義同故禁止之

三月廣建社倉整頓營務

辛未咸豐元年閏八月嚴禁天主教

壬子咸豐二年鄉試邑人吳名鳳重赴鹿鳴宴按名鳳係乾隆五十

七年壬子科舉人

癸丑咸豐三年粵匪李開方林鳳祥由天津竄至吳橋連

窩鎮縣民奔走避難

二月知縣彭載恩重修城門整理衙署

甲咸豐四年正月僧王討平粵匪於連窩鎮縣境始安

四月僧王扎調達年在甯津帶兵屯紮

五月逆匪千餘由縣境分竄

乙咸豐五年三月命通行銅鐵當十大錢並鉛鐵制錢

丁咸豐七年捻匪宋景詩由吳橋一帶南竄十月馬賊

復東竄擾及甯吳累月不靖

閏五月推行大錢鈔票縣分設票局

戊咸豐八年九月河間一帶土匪滋擾

辛咸豐十一年正月天河道孫治專辦天津河間兩府

團練

壬同治元年知縣彭載恩重修文廟

癸同治二年八月捻匪宋逆由邑西境南竄

辰同治七年知縣胡季烜防禦捻匪增修城垣

四月捻賊張總愚犯境武舉張玉魁等十四人太學生單鈺等二十六人死之縣境遇難者甚衆

是年清苑甯津等縣被賊竄擾緩征額賦有差

丙光緒二年知縣李秉衡重修崇聖祠

是歲大旱李公重修城垣以工代賑故雖飢而無盜

丁光緒三年李公議建修書院甫經始已升去闔邑爲立德政碑

庚光緒六年知縣邱濬恪修倉房兼修縣署

壬光緒八年知縣查宗仁創修臨津書院有碑記

癸未光緒九年天河道設立長蘆義塾二十處於津河二

府以仁命名甯津曰保仁

闔邑爲知縣查公立德政碑五月公以勞瘁卒於任

萬民懷痛

甲申光緒十年知縣王廷鈺移文昌閣創修呂祖祠

乙酉光緒十一年知縣王廷鈺重修崇聖祠

丁亥光緒十三年三月卽補道金福會挑老黃河以瀉運

河之水上至四女寺中出縣境下至海豐

知縣王廷鈺改修學宮風水有碑記

巳丑光緒十五年闔邑爲知縣王公立德政碑

庚寅光緒十六年知縣趙欽舜添設露園重修城隍廟

辛卯光緒十七年趙令又重修縣署科房

甲午光緒二十年趙令又建訓導學署

乙未光緒二十一年知縣楊善慶捐廉爲倡創建考院有

碑記

丙申光緒二十二年楊公復立南小店義學

知縣燕調緯就倉穀生息購買書籍六十餘種存之
書院以便生童繙閱

戊光緒二十四年二月知縣祝嘉庸奉辦昭信股票

八月河間郡試改試策論經義九月歲試學政按臨

悉復舊制

十一月知縣祝公奉辦保甲具有章程

己亥光緒二十五年知縣祝公奉督憲奏明錢糧銀每兩

定制錢兩干徵收
原奏聲明日後銀價如有漲落再行奏明辦理



